



partii naleraq

UKA 2017/017-01

28-09-2017

**Siusinaartumik pensionisiat pillugit Inatsisartut inatsisaaata allanngortinneqarnera pillugu inatsisartut inatsisaat nr xx, xx xxx 2017-imeersoq.**

(Isumaginninnermut, Ilaqutariinnermut Naligiissitaanermut Inatsisinillu Atuutsitsinnermut Naalakkersuisoq).

Siusinaartumik pensionisiat pillugit Inatsisartut inatsisaaata allanngortinneqarnera pillugu inatsisartut inatsisaat nr xx, xx xxx 2017-imeersoq Partii Naleraq sinnerlugu imannak oqaaseqarfigissuarput:

Aallaqqaasiullugu 2015-imi siusinaartumik sulisinnaajunnaarnersiutillit pillugit inatsisissatut siunnersuummi oqallinnermi oqaaseqaativut innersuussutigissuagut. Tassa taamanikkulli utoqqalinersiutit aamma siusinaartumik sulisinnaajunnaarnersiutit pillugit oqallinnermi naalakkersuisut siunnersuutaat naammaginartissimangilluinnaratsigit.

Pingaartumik minnerunngitsumillu aappaasup isertitai apeqqutaatinnagit aaqqissusseqqinniarnermik taallugu siunnersuut pissutsinut piviusunut naapertuutinnitsoq taamanikkulli takusinnaangatsigu, soorlu aamma taamani oqaaseqarnitsinni tamakku tamaasa itisilerlugit tunngavilersorluarlugillu inimi maani saqqummiukkivut.

Aamma taamanikkut ersarissumik oqaatigaarput aaqqissusseqqinniarneq siusinaartumik sulisinnaajunnaarnersiutilinnut aamma kisimiittunut ajortumik sunniuteqarsinnaasoq.

Aamma taamanikkulli mianersoqqussutigaarput, aappariit ilaat pisortaniit ikiorsiissutit pillugit taamanikkulli avittariaqalertarsimasut, tassagoq tamakkiisumik pisortaniit ikiorserneqartarniassagamik.

Maanna taamanikkut oqariartuutigisatta ilarpasui eqqortuusut uppernarsarneqartut takusinnaavarput, tassa taamanikkut aaqqissusseqqinneq siusinaartumik sulisinnaajunnaarnersiutilippassuarnut equinerlussimavoq, qujanartumillu maanna kukkussutinik iluarseeriarniartoqarmat neriuutigaarput pissutsit massakut ilorraap tungaanut saatinneqassasut.

Taamali oqareerluta maanna allannguinnissamik siunnersuut taama isikkoqaannassappat aamma pissutsinut piviusunut tamakkiisumik aaqqiissutaasinnaassanngitsoq takusinnaavarput.

Tassami ilaatigut aamma takusinnaavarput, tusarniaanermi akissutigineqartut qiviaraanni, allaat siunnersuutip 2018-imut aningaasanut inatsisissatut siunnersuummulluunniit suli ilanngunneqarsimanngillat.

Siusinaartumik sulisinnaajunnaarnersiutillit kisimiittut allannguutissatut siunnersuummi eqqaamaneqarsimanngillat.

Aappaasup isertitai apeqqutaajunnaassasut siunnersuummi oqaatigineqaralarpoq, kisianni siunnersuummut atatillugu tusarniaanermi ilaatigut Aningaasaqarnermut Akileraartarnermullu Naalakkersuisoqarfik akissuteqaammimi imatut allappoq:

“Siusinaartumik pensionisiaqartoq ukiumut 60.000 kr-inik ilaannakortumik sulisarnermigut isertitaqartoq, aappaqartorlu ukiumut 240.000 kr.inik isertitalimmik. Siusinaartumik pensionisiaqartup pineqartup aningaasat pssarsiassai allanngorluinnartussaapput apeqqutaatillugu siusinaartumik pensionisiaqartoq qaffasissutsimut sorlermut inissinneqarnersoq.

Siusinaartumik pensionisiaqartoq taanna qaffasinnerpaanik pensionisiaqartussatut inissinneqarsimaguni, qaffasinnerpaamik killiliussap 50 %-anik ukiumut pissarsissaaq 55.748 kr., illuatigulli aqqissuussakkut pineqartoq qaffasinnerpaamik killiliussap 20 %-ia pissarsiarissallugu 22.299 kr. Siusinaartumik pensionisialik akunnattunik minnerpaatullu pensionisiaqartussatut inissinneqartoq, pensionisiassaqaanngilaq”.

Aamma Partii Naleqqamiit assut isornartoqartipparput siusinaartumik sulisinnaajunnaarnersiutillit Isumaginninnikkut Maalaaruteqartarfimmut naammagittaalliuteqarsinnaanerit erseqqissumik periarfissinneqanngimmat, taamaallaalli Naalakkersuisut akissuteqarnerminni tamatuma kingusinnerusukkut pisariaqartinneqassappat misissorneqarsinnaasoq oqaatigiinnarmassuk.

Naggataatigut inunnik isumaginninnermut peqqissutsimullu ataatsimiititaliamut kaammattuutigissuarput siusinaartumik sulisinnaajunnaarnersiutillit qanoq pitsaanagerusumik ikiorserneqarsinnaanerit sulissutigeqqullugu aappaasup isertitai apeqqutaatinnagit aamma taakku pisariaqarfiaatigut angalasinnaanerannut tunngasut nunatsinniinnaanngitsoq, kisianni aamma danmarkimut utimullu pisariaqartillugu ilaqaatasup napparsimaneranut atatillugu toqusoqartilluguluunniit tapiiffigineqarsinnaanerit ilanngullugu pitsaanagerusunik periarfissinneqarnissaat sulissutigissagaat.

Taama naakkaluamik oqaaseqarluta siunnersuutip aappasaanneerpeqannginnerani  
Isumaginninnermut Peqqissutsimullu ataatsimiititaliami suliarineqarnissaa inassutigaarput.